



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԳՆ ՈՍՏԻԿԱՆՈՒԹՅԱՆ
ՊԱՐԵԿԱՅԻՆ ԾԱՌԱՅՈՒԹՅՈՒՆ**

0090, ք.Երևան, Շոպրոնի 77

N

9/13/15

< 19 > 06

2023թ.

**Նարեկ Բորիկի Խաչատրյանին
Հասցե՝ ք.Երևան, Դավիթ Անհաղթ փողոց, 18Ա փուն**

Ուղարկվում է վարչական մարմնի նախաձեռնությամբ ՀՀ ՆԳՆ ոստիկանության պարեկային ծառայության վարչական բողոքների քննության բաժանմունքում իրականացված վարչական վարույթի արդյունքում թիվ **8180245145** որոշումն անվավեր ճանաչելու մասին որոշման օրինակը:

Միաժամանակ հայտնվում է, որ նյութերը գրությամբ ուղարկվել են ՀՀ ՔԿ Երևան քաղաքի քննչական վարչության ՃՏՀ քննության բաժին՝ քրեական վարույթ նախաձեռնելու հարցը քննարկելու համար:

Առդիր՝ << 4 >> թերթ:

Հարգանքով՝

**Պետի պարտականությունների ժամանակավոր
կատարող, ոստիկանության գնդապետ՝**

Ա. Մաթևոսյան

Կատ. Գ.Կիրակոսյան

Ո Ր Ո Շ ՈՒ Մ

ՀՀ ՆԳՆ ոստիկանության պարեկային ծառայության վարչական իրավախախտման վերաբերյալ գործով 08.04.2023թ. կայացված թիվ **8180245145** որոշումն անվավեր ճանաչելու մասին

19.06.2023թ.

ք.Երևան

ՀՀ ՆԳՆ ոստիկանության պարեկային ծառայության պետի պարտականությունների ժամանակավոր կատարող, ոստիկանության գնդապետ Ա. Մաթևոսյանս, ղեկավարվելով <<Վարչարարության հիմունքների և վարչական վարույթի մասին>> ՀՀ օրենքի 67-րդ հոդվածով, վերանայելով 08.04.2023թ. կայացված թիվ **8180245145** որոշումը,

Պ Ա Ր Զ Ե Ց Ի

2023 թվականի մայիսի 29-ին ՀՀ ՆԳՆ ոստիկանության պարեկային ծառայության վարչական բողոքների քննության բաժանմունքում ստացվել է ՀՀ ՔԿ Երևան քաղաքի քննչական վարչության ՃՏՀ քննության բաժնի պետ, արդարադատության երրորդ դասի խորհրդական Գոռ Թադևոսյանի գրությունն այն մասին, որ 2023 թվականի ապրիլի 8-ին ժամը 22:30-ի սահմաններում Երևան քաղաքի Բաղրամյան պողոտայի թիվ 64 հասցեի դիմացի հատվածում միմյանց են բախվել Նարեկ Բորիկի Խաչատրյանի վարած «Ֆոլկսվագեն» մակնիշի 37 GP 838 հ/հ-ի, Հասմիկ Աշոտի Հայրապետյանի վարած «Միցուբիշի» մակնիշի 37 QA 858 հ/հ-ի և Ռոբերտ Կոլյայի Անդրեասյանի վարած «Նիսսան» մակնիշի 37 DG 293 հ/հ-ի տրանսպորտային միջոցները, որի հետևանքով վերջինիս վարորդը ստացել է մարմնական վնասվածքներ և բուժօգնության տեղափոխվել «Հերացի թիվ 1» ՀՀ, հաղորդման առթիվ ՀՀ ՔԿ ԵՔ քննչական վարչության ՃՏՀ քննության բաժնում հարուցվել է քրեական վարույթ և կատարվում է նախաքննություն:

Նախաքննության ընթացքում պարզվել է, որ Նարեկ Բորիկի Խաչատրյանը 2022 թվականի ապրիլի 18-ից զրկվել է տրանսպորտային միջոցներ վարելու իրավունքից 1 տարի ժամկետով, իսկ 2023 թվականի ապրիլի 8-ին պարեկային ծառայության ծառայողի կողմից կրկին որոշում է կայացվել, արդեն իսկ տրանսպորտային միջոցներ վարելու իրավունքից զրկված և զրկման ժամկետը դեռևս չավարտված Նարեկ Բորիկի Խաչատրյանին տրանսպորտային միջոցներ վարելու իրավունքից 1 տարի ժամկետով զրկելու մասին:

Նույն գրությամբ Գ.Թադևոսյանը խնդրում է տրամադրել վերը նշված երկու դեպքերով որոշումները կայացնելու հիմք հանդիսացած բոլոր փաստաթղթերի պատճենները, ինչպես նաև բեկանել 2023 թվականի ապրիլի 8-ին Նարեկ Բորիկի Խաչատրյանին տրանսպորտային միջոցներ վարելու իրավունքից 1 տարի ժամկետով զրկելու վերաբերյալ կայացված որոշումը:

2023 թվականի մայիսի 30-ին ՀՀ ՆԳՆ ոստիկանության պարեկային ծառայության վարչական բողոքների քննության բաժանմունքում ստացվել է նաև Երևան քաղաքի գնդի ՎՎԻ բաժանմունքի պետ, ոստիկանության մայոր՝ Արտյոմ Բաբիկյանի զեկուցագիրն այն մասին, որ Երևան քաղաքի գնդի 2-րդ գումարտակի, 3-րդ վաշտի կրտսեր պարեկ Արամ

Հարությունյանը, Նարեկ Բորիկի Խաչատրյանի նկատմամբ 2023 թվականի ապրիլի 8-ին ժամը 05:15-ին կազմել է վարչական իրավախախտման վերաբերյալ արձանագրություն և կայացրել թիվ 8180245145 որոշումը՝ Նարեկ Խաչատրյանին զրկելով տրանսպորտային միջոցներ վարելու իրավունքից 1 տարի ժամկետով, քանի որ վերջինս նույն օրը ժամը 05:10-ին, Երևան քաղաքի Թումանյան փողոցում «Ֆուկսվագեն» մակնիշի 37 GP 838 հաշվառման համարանիշի տրանսպորտային միջոցը վարել է ոչ սթափ վիճակում (վարորդի մեկ լիտր արտաշնչած օդի մեջ ալկոհոլի պարունակությունը գերազանցում է 0.5 միլիգրամը): Որոշման օրինակը քաղաքացի Ն.Խաչատրյանը ստացել է առձեռն:

Նույն զեկուցագրի համաձայն կայացված որոշումը պարեկային ծառայության արձանագրությունների էլեկտրոնային հարթակ մուտքելիս ինքնաշխատ գործող համակարգը ցույց է տվել, որ քաղաքացի Նարեկ Խաչատրյանի MB թիվ 860568 տրանսպորտային միջոց վարելու իրավունքի վկայականը ունի ուժը կորցրած (ժամկետանց) կարգավիճակ, իսկ վերջինիս MB թիվ 860568 տրանսպորտային միջոց վարելու վարորդական իրավունքի վկայականը ունի զրկված կարգավիճակ: ՃՈ էլեկտրոնային ռեգիստրի ստուգմամբ պարզվել է, որ Նարեկ Խաչատրյանը 18.04.2022թ.-ին ՀՀ ՆԳՆ ոստիկանության ՊԾ Երևան քաղաքի գնդի 2-րդ գումարտակի, 1-ին վաշտի ծառայողի կողմից կայացված թիվ 8180119797 որոշմամբ արդեն իսկ զրկվել է տրանսպորտային միջոցներ վարելու իրավունքից:

Զեկուցագրում նշված հանգամանքները հաստատվել են նաև կից ներկայացված վարչական իրավախախտման վերաբերյալ արձանագրության և զուգակցված թիվ 8180245145 որոշման, սթափության վիճակի զննության թիվ 00297 արձանագրության և ՃՈ էլեկտրոնային ռեգիստրի քաղվածքների պատճենների և թիվ 8180119797 վարչական կտի և կից նյութերի ուսումնասիրությամբ:

Պարեկային ծառայող Արամ Հարությունյանի պարզաբանման համաձայն սույն թվականի ապրիլի 8-ին Երևան քաղաքի Թումանյան փողոցում կանգնեցրել է Նարեկ Բորիկի Խաչատրյանի կողմից վարած <<ՖՈԼԿՍՎԱԳԵՆ>> մակնիշի 37 GP 838 հաշվառման համարանիշի տրանսպորտային միջոցը, ստուգմամբ պարզվել է, որ վարորդը գտնվում է ոչ սթափ վիճակում (սթափության վիճակի զննության թիվ 00297 արձանագրություն), տվյալ պահին դյուրակիր համակարգիչը ունեցել է կապի խնդիր և հնարավոր չի եղել կատարել անձի նույնականացում և տեղում թղթային տարբերակով կազմել է վարչական իրավախախտման վերաբերյալ արձանագրություն և կայացրել թիվ 8180245145 որոշումը՝ զրկելով վարորդին տրանսպորտային միջոցներ վարելու իրավունքից 1 տարի ժամկետով:

«Ճանապարհային երթևեկության անվտանգության ապահովման մասին» ՀՀ օրենքի 29-րդ հոդվածի համաձայն՝

1. Անձի վարելու իրավունքը դադարում է, եթե՝

առկա է նրան անգործունակ ճանաչելու մասին դատարանի՝ օրինական ուժի մեջ մտած վճիռ.

առկա է նրա՝ հոգեկան, թմրամիջոցների և (կամ) հոգեմետ (հոգեներգործուն) նյութերի օգտագործմամբ պայմանավորված հիվանդության վերաբերյալ և (կամ) առողջական

վիճակը օրենսդրությամբ սահմանված պայմաններին չհամապատասխանելու մասին իրավասու մարմնի եզրակացություն.

առկա է վարելու իրավունքից զրկելու մասին դատարանի՝ օրինական ուժի մեջ մտած դատական ակտ կամ իրավասու այլ մարմնի՝ ուժի մեջ մտած ակտ.

նա մահացել է:

2. Անձի վարորդական վկայականն ուժը կորցնում է, եթե՝

առկա է սույն հոդվածի 1-ին մասով նախատեսված հիմքերից որևէ մեկը.

լրացել է վարորդական վկայականի գործողության ժամկետը.

վարորդական վկայականը կորել է, և անձը դիմել է նոր վկայական ստանալու համար կամ իրազեկել է կորստյան մասին:

<<Վարչական իրավախախտումների վերաբերյալ>> ՀՀ օրենսգրքի 128-րդ հոդվածի 7-րդ մասի համաձայն՝ անձը համարվում է տրանսպորտային միջոցներ վարելու իրավունքից զրկված, եթե նա օրենքով սահմանված կարգով զրկվել է տրանսպորտային միջոցներ վարելու իրավունքից, և զրկման ժամկետը չի լրացել (...)

<<Վարչական իրավախախտումների վերաբերյալ>> ՀՀ օրենսգրքի 9-րդ հոդվածի 2-րդ պարբերությունը սահմանում է, որ սույն օրենսգրքով նախատեսված իրավախախտումների համար վարչական պատասխանատվություն առաջանում է, եթե այդ խախտումները իրենց բնույթով քրեական պատասխանատվություն չեն առաջացնում գործող օրենսդրությանը համապատասխան:

ՀՀ քրեական օրենսգրքի 344-րդ հոդվածի 1-ին մասը քրեական պատասխանատվություն է նախատեսում տրանսպորտային միջոցներ վարելու իրավունքից զրկված կամ տրանսպորտային միջոցներ վարելու իրավունքը կասեցված անձի կողմից տրանսպորտային միջոց վարելու համար:

<<Վարչարարության հիմունքների և վարչական վարույթի մասին>> ՀՀ օրենքի 63-րդ հոդվածի 1-ին մասի <<ա>> կետի համաձայն՝ անվավեր է առ ոչինչ չհանդիսացող այն ոչ իրավաչափ վարչական ակտը, որն ընդունվել է օրենքի խախտմամբ, այդ թվում՝ օրենքի սխալ կիրառման կամ սխալ մեկնաբանման հետևանքով:

Նույն օրենքի 77-րդ հոդվածի 1-ին մասի <<ա>> կետը սահմանում է, որ 63-րդ հոդվածով սահմանված հիմքերը վարչական ակտի փոփոխման կամ բեկանման հիմքեր են:

<<Վարչարարության հիմունքների և վարչական վարույթի մասին>> ՀՀ օրենքի 67-րդ հոդվածի համաձայն՝ վարչական մարմնի ընդունած վարչական ակտի վերաբերյալ բողոքի բացակայության դեպքում այդպիսի ակտ ընդունած վարչական մարմնի վերադաս վարչական մարմինը (պաշտոնատար անձը), վերահսկողության կարգով և իր նախաձեռնությամբ, իրավունք ունի վերանայել ստորադաս վարչական մարմնի ընդունած վարչական ակտը:

Տվյալ պարագայում ՀՀ ՆԳՆ ոստիկանության պարեկային ծառայության Երևան քաղաքի գնդի 2-րդ գումարտակի 3-րդ վաշտի կրտսեր պարեկ Արամ Հարությունյանը 08.04.2023թ.-ի թիվ 8180245145 որոշումն ընդունել է օրենքի սխալ կիրառմամբ, այսինքն՝ ընդունել է ոչ իրավաչափ վարչական ակտ, քանի որ քաղաքացի Նարեկ Բորիկի Խաչատրյանի կողմից տրանսպորտային միջոցներ վարելու իրավունքից զրկված վիճակում տրանսպորտային միջոցը վարելը նախատեսում է քրեական

պատասխանատվություն, ուստի թիվ 8180245145 որոշումը ենթակա է անվավեր ճանաչման:

«Վարչական իրավախախտումների վերաբերյալ» ՀՀ օրենքի 251-րդ հոդվածի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ:

Այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության ենթարկվող անձի բացատրություններով, տուժողի, վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

«Վարչական իրավախախտումների վերաբերյալ» ՀՀ օրենքի 252-րդ հոդվածի համաձայն՝ մարմինը (պաշտոնատար անձը) ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և սոցիալիստական իրավագիտակցությամբ:

Ելնելով վերոգրյալից և ղեկավարվելով «Վարչարարության հիմունքների և վարչական վարույթի մասին» ՀՀ օրենքի 63-րդ հոդվածի 1-ին մասի «ա» կետով և 67-րդ հոդվածով՝

Ո Ր Ո Շ Ե Ց Ի

1. ՀՀ ՆԳՆ ոստիկանության պարեկային ծառայության վարչական իրավախախտման վերաբերյալ գործով 08.04.2023թ. կայացված թիվ 8180245145 որոշումը ճանաչել անվավեր:

2. Որոշման օրինակը երեք աշխատանքային օրվա ընթացքում հանձնել Նարեկ Բորիկի Խաչատրյանին և ՀՀ ՆԳՆ ոստիկանության պարեկային ծառայության Երևան քաղաքի գունդ:

3. Նյութերը գրությամբ ուղղարկել ՀՀ ՔԿ Երևան քաղաքի քննչական վարչության ՃՏՀ քննության բաժին՝ քրեական վարույթ նախաձեռնելու հարցը քննարկելու համար:

4. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:

Պետի պարտականությունների ժամանակավոր

կատարող, ոստիկանության գնդապետ՝



Ա. Մաթևոսյան